

L'Èrnouvé par Augustus Asplet Le Gros

Jé ouai du chant dans les vallées,  
Dé l'èrnouvé jé vai les pas;  
Vèrte est la bliète dans l's allées,  
lou la feugu'thole êtend ses bras.  
La douoche êpîngne est èrflièuthie,  
Les flieurs nos craissent souos les pids:  
Tout à l'entou hale à la vie:  
Chantez, ouaîsieaux, grands et pétits!

Ah! qué la tèrre est achteu belle,  
Et tout est vèrt, et tout est frais;  
Lé coucou r'veint, l'héthondelle  
Èrchèrche san nid souos nos faîts.  
Chantez en êl'vant vos fanmil'yes;  
Les grands fossés sont pour vos nids  
Des habitacl'yes bein trantchil'yes:  
Chantez, ouaîsieaux, grands et pétits!

